

16. oktober 2009

UKA 2009/122

[Ilanngussaq](#)

**Aningaasarsianit akileraarutit pillugit Inatsisartut inatsisaata  
allanngortinneqarneranik Inatsisartut inatsisaat nr. xx.xxxxx  
2009-meersoq**

**pillugu**

**Inatsisartut Akileraartarnermut Akitsuusiisarnermullu  
Ataatsimiititaliaata**

**ISUMALIUTISSIISSUTAA**

**Siunnersuutip aappassaaneernerani saqqummiunneqartoq**

Akileraartarnermut Akitsuusiisarnermullu Ataatsimiititaliaq  
suliarinninnermini ukuninnga inuttaqarpoq:

Inatsisartunut ilaasortaq Niels Thomsen (siulittaasoq)  
Inatsisartunut ilaasortaq Harald Bianco (siulittaasup tullia)  
Inatsisartunut ilaasortaq Aqqualuaq Egede  
Inatsisartunut ilaasortaq Karl Lyberth  
Inatsisartunut ilaasortaq Aleqa Hammond  
Inatsisartunut ilaasortaq Jens Imanuelsen

Siunnersuutip siullermeerneqarnera tunngavigalugu siunnersuut  
ataatsimiititaliamit misissorneqarpoq.

## **Siunnersuutip imarisaa**

Aningaasarsianit akileraarutit pillugit inatsimmut allannguutissatut siunnersuutit sisamat siunnersuutip imarai:

1) Siullermik siunnersuutigineqarpoq aatsitassatigut pisuussutinik misissueqqaarnernut, misissueqqissaarnernut aammalu piaanermut atatillugu killilimmik akileraartussaaneq pillugu malittarisassanik eqqussineqassasoq inatsiseqartitsinikkut tunngavissat paasinarnernulernissaat siunertaralugu. Tamatumunnga ilanngullugu siunnersuutigineqarpoq aatsitassatigut pisuussutinik misissueqqaarnernut, misissueqqissaarnernut aammalu piaanermut atatillugu ingerlatsinerit aammalu tamatumunnga atatillugu inuit sulisut akileraartussaataanerit pillugu malittarisassanik eqqussineqassasoq.

2) Aappassaattut siunnersuutigineqarpoq akeqanngitsumik biileqartitaanerup akileraarusigaanerata annertussusiligaanera qaffaaffigineqassasoq. Tamatumuunakkut nalinginnaasumik atugaalluartumik sulisunut ajunngitsorsiarititaasumik, biilimik atugassinneqarnermi aningaasatigut iluaqutissinneqarnermut ersersitsinerusumik ullutsinnullu naleqqunnerusumik, akileraarusiinissaq aammalu pisortat akileraarutitigut isertitaannik pisariaqartumik annertusaanissaq eqqarsaatigineqarput.

3) Pingajussaattut selskabinik nalikillilerissutigisassanik atunngisaqartunik nioqquteqarsinnaanerup pakkersimaarneqarnissaanik siunnersuut siunertaqarpoq. Kalaallit Nunaanni akileraartarnermi nalikillilerinerit tunngasutigut malittarisassat nunarsuarmi nunanut allanut sanilliullugit ammanerujussuupput orniginartuullutillu. Akileraartarnermi nalikillilerinerit Kalaallit Nunaanni malittarisassat nunarsuarmi nunanut allanut assersuussinerit aningaasaliinissamut ussasaarinninnerit ilapittuutaapput. Allannguutissat siunnersuutigineqartut tamatuma allanngortinnissaanik siunertaqanngillat, taamaallaalli malittarisassat atuuttuusut iluarinangitsumik sunniutaat illuatungilerniarneqarlutik.

4) Sisamaattut siunnersuutigineqarpoq nunani allamiut sulisitsisuisa akissarsianik, siulersuisut akissarsiaannik allanillu tunniussinerit atatillugu akileraarutit A-nik unerartitsinissamut nalunaarutiginninnissamullu pisussaaffeqarnerat sakkortusineqassasoq. Tamanna pissalluni inunnit selskabiniillu, Kalaallit Nunaanni eqqartuussiveqarfimmi najugaqanngitsunit akissarsianik, siulersuisut akissarsiaannik allanillu tunniussinerit, assigisaannik tunniussinertuulli A-nik aningaasarsiannngortinneqarnerisigut. Tamatumalu saniatigut

unerartitsinissamut pisussaaffeqartut akileraarutit A-nut unerartitat pillugit nalunaarusiamik Kalaallit Nunaanni suliarisassagaat piumasarineqarluni, taamatullu paasissutissat suliamut attuumassuteqartut maani nunami uninngatinneqartassasut, unerartitsisussaaitap nunami angerlarsimaffigisaa Kalaallit Nunaatalu akornanni Kalaallit Nunaannut akileraarutinik unerartitsineq pillugu isumaqatigiissuteqanngippat.

### **Siunnersuutip Inatsisartuni siullermeerneqarnera**

Aatsitassarsiormi inuussutissarsiutinilu allani pisariaqartitsinermut akileraartarnermi inatsisip aaqqinneqarnissaanik siunnersuutikkut siunertarineqartut siullermeerinermi partiinit tamanit taperserneqarput, tamatumani immami kultbrintisiormik akileraarusiinissamut Kalaallit Nunaata periarfissaqarnera erseqqissarneqarluni, tak. qulaani 1).

Taamatuttaaq akileraarutitigut nalikilliliinerit pillugit maleruagassanik atornerluinissap pinaveersimatinneqarnissaa pillugu siunnersuutip ilaa taperserluarneqarpoq, tak. qulaani 3), soorluttaaq siunnersuutip ilaa sulisitsisut nunanit allaneersut akileraarutinik A-nik unerartitsinissamut nalunaarutiginninnissamullu pisussaaffeqarnerisa sukateriffiqarneqarnissaanik siunertaqartoq taperserluarneqartoq, tak. qulaani 4).

Siunnersuummi akeqanngitsumik biileqartitaanerup akileraarusigaanerata annertussusiligaanerata iluarsivigineqarnissaannut tunngasoq **Inuit Ataqtigiit Demokraatillu** taperserpaat, tak. qulaani 2).

Akeqanngitsumik biileqartitaanerup akileraarusigaanerata annertussiligaanerata qaffaavigineqarnissaa **Siumumit** aamma taperserneqarpoq, ernummatigineqarlunili ilaatigut porturit, qatserisartut politiillu akileraarutinik qaffaanermi aamma eqqugaanissaat, tamanna Siumut malillugu inuiaqatigiinnut pitsaanngitsumik kinguneqarsinnaavoq, tassa inuit taakku suliffiup avataani biileqarsinnaajunnaarnerannik biileqarusukkunnaarnerannilluunniit tamanna kinguneqassappat.

Akeqanngitsumik biileqarneq qaffasissumik akileraarusigaareersoq qaffaaqqinnerullu kingunerisinnaagaa inuit aaqqissuussinermik taamaattumik atuerusukkunnaarnerat, tamannalu Nunatta Karsiata isertitassaraluisa annaaneqarnerannik kinguneqarsinnaasoq **Atassutip** oqaatigaa.

“Akeqanngitsumik biileqartitaanneq” aamma “atorfimmuut atatillugu biileqartitaanneq” immikkoortissallugit pingaaruteqartoq

siullermeerinermi **Naalakkersuisut** oqaatigaat, tassa atorfirmut atatillugu biilerisat akileraarusigaaneq ajormata, taamaattumillu akileraarutiniq qaffaanermit ilaatinneqaratik.

### **Akileraartarnermut Akitsuusiisarnermullu Ataatsimiititaliap siunnersuummik suliarinninnera**

Akeqanngitsumik biileqartitaanerup akileraarusigaanerata annertussiligaaneraniq qaffaanissamik siunnersuutigineqartumut atatillugu ataatsimiititaliamit oqaatigineqassaaq tamanna aningaasarsianit akileraarutit pillugit Inatsisartut inatsisaanni nr. 12, 2. november 2006-meersumi maleruagassiuunneqarmat, taassani § 19-imi ima allassimasoqarluni:

**§ 19.** Aningaasarsiat akileraaruteqaataasussat naatsorsorneranni biilip, akileraartartup sulisitsisuminit atorfinitsitaanerminut allatulluunniit ikiuulluni sulinissaminik isumaqatigiissuteqarnerminut atatillugu privatimik atorsinnaasaata nalinga ilanngunneqassaaq, tak. Imm. 2-miit 8-mut. Tamanna aamma atuuppoq inunntu siulersuisuni, ataatsimiititaliani, kommissionini, siunnersuisooqatigiinni, immikkut qinikkani allatulluunniit ataatsimoorfiusuni, tamatumani ilanngullugit Naalakkersuisunut, Inatsisartunut kommunalbestyrelsinullu ilaasortatut qinerneqarsimasunut tamakkunungaluunniit ikiortaasunut.

*Imm. 2.* Illoqarfik biilip privatimik atorineqarfia 75.000 kvadratmeterisut annertutigisumik annertunerusumulluunniit aqqusineqarpat, biilip imm. 1-imi pineqartup akileraarutitigut nalinga ukiumut 40.000 koruuninik annertussusilerneqassaaq.

*Imm. 3.* Illoqarfik biilip privatimik atorineqarfia 25.000 kvadratmeterinit 75.000 kvadratmeterillu akornanni annertutigisumik aqqusineqarpat, annertussusiliussaq imm. 2-mi taaneqartoq 20.000 koruuninut appartinneqassaaq.

*Imm. 4.* Illoqarfik biilip privatimik atorineqarfia 25.000 kvadratmeterit inorlugit annertutigisumik aqqusineqarpat, annertussusiliussaq imm. 2-mi taaneqartoq 10.000 koruuninut appartinneqassaaq.

*Imm. 5.* Biilit sulliviittut aqqussukat biilinilu immikkut sanaajusunik allanik privatimik atuineq angissusiliussat imm. 2-miit 4-mut taaneqartut affaannut annertussusilerneqassaaq. Biilit tamaattut sulisitsisup allaganngorlugu peqqussuteqarneratigut angerlarsimaffiup suliffiullu akornanniinnaq atorineqartarpata annertussusiliussat imm. 2-miit 4-mut taaneqartut sisamararterutaannut annertussusilerneqassapput.

*Imm. 6.* Lastbiiliniq 4 tonsit sinnerlugit oqimaassusilinnik kiisalu biiliniq tankiminni usisartunik, kraninik kivitsissutinik aammalu eqqaasut biiliniq privatimik atuineq akileraaruserneqartussaangilaq.

*Imm. 7.* Biilit ukiup ilaannaani atugassaritinneqarpata nalingat akileraaruteqaataasussaq ullunik biiliniq atuffiunngitsunik ilanngarlugu appartinneqassaaq. Akileraartussaataasooq biilit atorsinnaanerinit akiliuteqarpat, nalinga akileraaruteqaataasussaq aningaasanik akiliutigineqarsimasunik ilanngarlugu appartinneqassaaq.

*Imm. 8. Sulisitsisup allaganngorlugu peqqussutigisimappagu akileraartussaataasooq suliartoqquneqarnermini biiliniq atuissasoq, akileraartussaataasup angerlarsimaffimmi suliffimmilu akornanni biilimik atuinera privatimik atuineranut isigineqassanngilaq, aatsaalli akileraartussaataasup suliartoqquneqarsinnaanermi nalaani biilit privatimik atugassarinnippagit.”*

Imm. 2,3 aamma 4-mi aningaasartaliussat annertussusaannik allannguinnissaq siunnersuummi kisimi pineqarpoq. Tamatuma saniatigut aalajangersakkami allannguisoqanngilaq.

Imm. 5 pillugu inatsimmut nassuiaatini ima allassimasooq ataatsimiititaliap maluginiarpa:

*”Sullivimmi biilit imatut paasineqassapput biilit matoqqasut aalajangerlugit ikkussakanik ilitsivillit aammalu aalajangikkanik sakkunut ilitsivillit. Biilit immikkut ittut allat assersuutigalugu tassapput ikiuiartorluni biilit atorineqartartut tamarmik, ilisiartortut qamutaat il.il. Biilit ikiuiartorluni atorineqartartut tassaapput polititit sulinermi, inunnik annaassiniarnermi, ikuallattoqarnerani, mingutsitsisoqarnerani, angallannikkut ajutoortoqarnerani annertuumik ajutoortoqarnissaanik pinngitsoortitsiniarnermi atorineqartartut, biili ataatsimik arlalinnilluunniik tungujortunik ikittaartoqarpat aammalu ikiuiartorluni assigiinngitsunik marlunnik nipilimmik siggartaateqarpat. Imm. 5-imi akimut appasinnerusumut piumasaqaataalluinnarpoq biilit taakku taamaallaat angerlarsimaffiup suliffiullu akornanni atorineqassasut. Sulisoq ukiumut ataasiaannarluniluunniit biilit taakku inuttut atorpagit taamatut biiliniq ingerlaneq imm. 2-mi, 3-mi imaluunniit 4-mi ukiumut akit malillugit akileraaruserneqassaaq.”*

Taamaalilluni sullivimmi biilit aasersuutigalugulu biilit ikiuiartorluni atorineqartartut privatimik atorineqarunik aallaavittut isigalugu aningaasat imm. 2-mi, 3-mi 4-milu taaneqartut affaannik akileraarusigaassasut imm. 5-imi tassungalu nassuiaatini takuneqarsinnaavoq. Tamatumunnga pissutaavoq biilit imm. 5-imi taaneqartut nalinginnaasumik ima ilusiligaasarmata privatimik atorineqarnissaminnut naleqqunatik.

Tamatuma saniatigut imm. 5-imi oqaaseqatigiit aappaat naapertorlugit sulisitsisup allaganngorlugu peqqusineratigut biili angerlarsimaffiup suliffiullu akornanni angallassissutituinnaq atorineqarpat akileraarutaasartut sisamararterutaannanngortinneqassapput. Tamatumani ilaatigut pineqarput biilip sanaartorfiusumi assigisaaniluunniit unnuaq naallugu nakkutigineqarani uninnganissaa pinngitsoorniarlugu biilip angerlaannissaanik sulisitsisup sulisuni peqquppagu. Biili sulisup privatimik atorpagu imm. 5-imi oqaaseqatigiit siulliit malillugit akileraarusiisoqassaaq, tassa “affarmik akileraarusiisoqarluni”.

Biilnik qatserisartunit, politiinit peqqissaanermillu suliaqartunit atorneqartut akileraaruserneqartarnerat pillugu Inatsisartut Suleriaasianni § 36, imm. 1 naapertorlugu apeqqummut Naalakkersuisut akissutaat aamma innersuussutigineqarpoq. Akissut ilanngussaq 1-itut ilanngunneqarpoq.

### Aggersarneqarsinnaalluni pigaartuuneq / Atorfimmut atatillugu biilit

“Atorfimmut atatillugu biilit” akileraartarnermut inatsisini taaguutitut atorneqanngitsaq, biilnulli § 19, imm.8-mi pineqartunut nalinginnaasumik taaguutaasoq ataatsimiititaliap maluginiarpaq. Tassunga nassuiaatini ilaatigut allassimavoq:

”Sulisup aggersarneqarsinnaalluni pigaartuuneranun atatillugu angerlarsimaffiup suliffeqarfiullu akornanni biilimik ingerlaneq akileraaruserneqassanngilaq. Aggersarneqarsinnaalluni pigaartuusoqartarpoq sulisoq pigaartuunermini angerlarsimaffimminiit sumiiffinnut "assigiinngiiaartunut" siumut ilisimaneqariinngitsunut aggersarneqarsinnaagaangat.

Imm. 8 malillugu aggersarneqarsinnaalluni pigaartuugaanni, aallaaviusumik piffissap nalinginnaasumik suliffiusup avataani angerlarsimanissamut pisussaaffilerneqarsimasoqassaaq kiisalu aggersarneqarsinnaalluni pigaartuunertut immikkut akissarsiaqartoqassalluni, apeqqutaatinnagu aggersaaneqarneraq aggersarneqannginnersorluunniit. Inuk attaveqarfigineqarsinnaasoq piffisap nalinginnaasumik suliffiusup avataani aggersarneqartoq, sulisitsisup illuutaani ajutoortoqartillugu tillinniartoqartilluguluunniit imm. 8 malillugu aggersarneqarsinnaalluni pigaartuusutut isigineqanngilaq.

Sulisuq aggersarneqarsinnaalluni pigaartuusoq inuttut inuunermini killiliiffigineqavissimassaaq. Assersuutigalugu sulisoq piffissami aggersarneqarsinnaanermi qasuersimalluni aalakoornanilu suliarorsinnaasariaqarpoq. Aammattaaq pisussaaffeqavittoqassaaq. Oqarasuaatikkut attaveqatigiittarnermi, sulisup suliarortussaataitanerminik allamut ingerlatitseqqiginnarsinnaanera piviusutut isigineqanngilaq ...

Angerlarsimaffittut paasineqassaaq sumiiffik aalajangersimasumik siniffigisartagaq, suliffimmut atatillugu angalaneq, napparsimaneq assigisaalluunniit pissutigalugit tassaniinngikkaanni siniffigineqartartoq aammalu pigisanik inissivigineqamik.

Sumiiffiit "assigiinngiiaartut" ilisimaneqariinngitsut tassaapput illoqarfimmi suliffiugallartunut siumoorluni ilisimanngisanut aggersarneqarfiusinnaasut. Apeqqutaanngilaq sumiiffiit taakku ilisimaneqarnermut, kisiannili imatut amerlatigissapput sumiiffinnut taakkununga assigiinngiiaarpassuarnut aggersarneqarsinnaaneq siumut ilisimaneqarsinnaanani. Nalinginnaasumik suliffik oqaatsimut sumiiffinnut

"assigiinnngiaartut"-nut ilaanngilaq, aammattaaq sulisitsisoq illoqarfimmi arlalinnik adresseqaraluarpuunniit.

Akileraaruteqannginnissamut piunasaqaataalluinnarpoq aggersarneqarsinnaalluni pigaartuunermut atatillugu sulisup angerlarsimaffiup suliffiullu akornanni biilernissaanik sulisitsisup allakkatigut pisussaaffiliisimanissaa kiisalu allakkatigut aalajangersarneqarsimassalluni sulisoq aggersarneqarsinnaalluni pigaartuunermini inuttut biilnik namminermt tunngasumik allamut ingerlassanngitsoq. Sulisoq ukiumut ataasiaannarluniluunniit biilit taakku inuttut atorpagit taamatut biilnik ingerlaneq imm. 2, 3 aamma 4-mi ukiumut akit tunngavigalugit akileraaruserneqassaaq”.

Sulinermt atatillugu biilerisat aggersarneqarsinnaalluni pigaartuunermut atatillugu atorneqartut privatimik ingerlaarnermt atorneqanngikkunik akileraarusigaaneq ajortut ataatsimiititaliamit maluginiarneqarpoq. Biili privatimik ingerlaarnermt atorneqarpat imm. 2, 3 aamma 4 naapertorlugit akileraarusiisoqassaaq. Ikiuartorluni biili atorneqartartoq imaluunniit sullivimmi biili pineqarpat imm. 5 malillugu akileraarusiisoqassaaq, tassa “affarmik akileraarusiisoqarluni”.

#### § 19, imm. 1-5 naapertorlugit biilnik atuinerup aningaasatigut kinguneri

Akeqanngitsumik biileqartitaanerup akileraartarnermi nalinga kingullermik Inatsisartut inatsisaatigut nr. 9-ikkut, 29. oktober 1999-imeersukkut aaqqiivigineqartoq ataatsimiititaliap maluginiarpaa. 2000-imi januarimiit 2009-mi januarimut akit nalinginnaasumik 28 procentip missaanik qaffassimapput aammalu ilaatigut qamutunut motoorilinnut akunnattumik oqimaassusilinnut akileraarut 2004-mi 1.550 koruuninik ukiumut qaffanneqarluni.

Akileraartarnermi procenti 42-miitillugu siunnersuutigineqartoq malillugu akeqanngitsumik biileqartitaanermt naligititaasoq 60.000 koruuniuppat akileraarutitut akiliutissaq ukiumut 25.200 koruuniussaaq. Assersuutigalugu nammineq biilerisamut pisiarinerani 175.000 koruuneqartumut (akunnattumik oqimaassusilik) erniaqartitsineq 9%-iuppat ukiunilu 15-ini nalikillilerinermi ernialersuinermt nalikillilerinermtullu aningaasartuutit ukiumi siullermi 27.500 koruunit missigissavaat. Tamatuma saniatigut orsussamut, akileraarutitut, aserfallatsaaliinermt sillimmasiinermtullu aningaasartuutit aamma akilernerneqassapput. Akileraartussaataasunut amerlasuunut taamaasilluni suli pilerinarnerussaaq sulisitsisumit biilimik atugassinneqarnissaaq namminerisamik biilitaarnissaminngarnit.

Assersuutitut naatsorsuinerit:

Illoqarfiit 75.000 kvadratmeterimit takinerusunik aqqusinillit:

(Taakku ullumikkut tassaapput: Qaqortoq, Narsaq, Nuuk, Sisimiut, Asiaat aamma Ilulissat)

Akeqanngitsumik biileqartitaanerup nalinga 60.000 kr.-iuppat atuisoq qaammammut 2.100 kr.-inik aningaasartuuteqassaaq (siusinnerusukkut 1.400 kr.)

Imm. 5-imi oqaaseqatigiit siulliit naapertorlugit akeqanngitsumik biilerisap (sullivimmi biili il.il.) nalinga  $60.000/2 = 30.000$  kr.-iuppat atuisoq qaammammut 1.050 kr.-inik aningaasartuuteqassaaq (siusinnerusukkut 700 kr.)

Imm. 5-imi oqaaseqatigiit aappaat naapertorlugit biilerisap nalinga  $60.000/4 = 15.000$  kr.-iuppat atuisoq qaammammut 525 kr.-inik aningaasartuuteqassaaq (siusinnerusukkut 350 kr.)

Illoqarfiit 25.000 aamma 75.000 kvadratmeterit akornanni takissusilinnik aqqusinillit:

(Taakku ullumikkut tassaapput: Nanortalik, Ivittuut, Paamiut, Maniitsoq, Qasigiannugit, Qeqertarsuaq, Ummannaq, Upernavik aamma Tasiilaq)

Akeqanngitsumik biileqartitaanerup nalinga 30.000 kr.-iuppat atuisoq qaammammut 1.050 kr.-inik aningaasartuuteqassaaq (siusinnerusukkut 700 kr.)

Imm. 5-imi oqaaseqatigiit siulliit naapertorlugit akeqanngitsumik biilerisap (sullivimmi biili il.il.) nalinga  $30.000/2 = 15.000$  kr.-iuppat atuisoq qaammammut 525 kr.-inik aningaasartuuteqassaaq (siusinnerusukkut 350 kr.)

Imm. 5-imi oqaaseqatigiit aappaat naapertorlugit biilerisap nalinga  $30.000/4 = 7.500$  kr.-iuppat atuisoq qaammammut 262,50 kr.-inik aningaasartuuteqassaaq (siusinnerusukkut 187,25 kr.)

Illoqarfiit 25.000 kvadratmeterit ataallugit takissusilinnik aqqusinillit:

Taakku ullumikkut tassaapput: Kangaatsiaq, Qaanaaq aamma Illoq-qortoormiut)



Akeqanngitsumik biileqartitaanerup nalinga 15.000 kr.-iuppat atuisoq qaammammut 525 kr.-inik aningaasartuuteqassaaq (siusinnerusukkut 350 kr.)

Imm. 5-imi oqaaseqatigiit siulliit naapertorlugit akeqanngitsumik biilerisap (sullivimmi biili il.il.) nalinga  $15.000/2 = 7.500$  kr.-iuppat atuisoq qaammammut 262,50 aningaasartuuteqassaaq (siusinnerusukkut 187,25 kr.)

Imm. 5-imi oqaaseqatigiit aappaat naapertorlugit biilerisap nalinga  $15.000/4 = 3.750$  kr.-iuppat atuisoq qaammammut 131,25 kr.-inik aningaasartuuteqassaaq (siusinnerusukkut 87,50 kr.)

Siuliani allassimasut tunngavigalugit ataatsimiititaliamit oqaatigineqassaaq akeqanngitsumik biileqartitaanermi akileraarutit annertussusiligaanerisa qaffanneqarnissaanik siunnersuutikkut biiliniik taama atuisut nammineq privatimik biileqarnerminni aningasartuutigisassaminnit annerusunik artukkerneqassanngitsut.

Illoqarfinni 75.000 kvadratmiiterit ataallugit takissusilinnik aqqusineqartuni biiliniik nammineq pigisaqartut illoqarfinni takinerusunik aqqusineqartuni biilit atornerqarnerannut aningaasartuutaasartut annertoqataannik aningaasartuuteqartarnerat eqqarsaatigigaanni akileraarusiineq suli annikitsuararsuuvoq.

Ataatsimiititaliamit aamma oqaatigineqassaaq biilit aggersarneqarsinnaalluni pigaartuunermi taamaallaat atornerqartut inatsimmi § 19, imm. 8 naapertorlugu akileraarusigaannginnerat allanngortinneqanngimmat.

Taamaattoq aggersarneqarsinnaalluni pigaartuunermi akileraarutiniik akiliisussaataassanngikkaanni piumasaaqatit sakkortummata ataatsimiititaliamit oqaatigineqassaaq. Minnerunngitsumik imm. 8-mut nassuiaatini oqaasertaliussat uku ”... *aallaaviusumik piffissap nalinginnaasumik suliffiusup avataani angerlarsimanissamut pisussaaffilerneqarsimasooqassaaq kiisalu aggersarneqarsinnaalluni pigaartuunertut immikkut akissarsiaqartoqassalluni, apeqqutaatinnagu aggersaaneqarnerooq aggersarneqannginnorsorluunniit*” kiisalu ”*Sulisoq aggersarneqarsinnaalluni pigaartuusoq inuttut inuunermini killiliiffigineqavissimassaaq*” sakkortuutut isigineqartariaqarput. Akileraartinneqarnissaaq pinngitsoorniaannarlugu aggersarneqarsinnaalluni pigaartuusarnermik pilersitsioqarnissaa pinngitsoortinniarlugu tamanna pisariaqarsinnaavoq.

Tassunga atatillugu ataatsimiititaliamit oqaatigineqassaaq assersuutigalugu sulisup niuerniarnissaa, paaqqinnittarfinnut

meeqqaminik aallernissaa assigisaanilluunniit iliornissaa piumasaqaatit taama sakkortutiginerisa ajornartissammasuk, taamaaliornerluunniit sulinermut atatillugu biilerisat atorngit ingerlanneqaralarpat. Taamaalillunilu kisimiittut atorfinnik aggersarneqarsinnaalluni pigaartuusarnermik ilaqartumik suliffeqarnissaat ajornarsinnaavoq ajornakusoorsinnaalluniluunniit.

§ 19, imm. 8-mi oqaasertaliussat; ” ... Sulisitsisup allaganngorlugu peqqussutigisimappagu akileraartussaataasoq suliartoqquneqarnermini biiliniq atuissasoq ...”, kiisalu nassuiaatinit siuliani issuugaq ima paasineqarsinnaapput “peqqussut” taamaattoq suliartoqquneqarsinnaanerup pisarissersuutaanera pissutigalugu sulisup tamatumunnga naapertuuttumik qaffasinnerusumik akissarsiaqartitaaneraniq kinguneqartoq. Nalinginnaasumilli tamanna pineq ajorpoq sulisitsisullu inatsimmik sukangannginnerusumik atuinertigut ajornartorsiut “aaqqinneqartarpoq”, taamaalillunilu sulisoq assersuutigalugu niuerniarsinnaasarluni. Taamatulli ”pisariinnerusussaq pillugu paasinninnerit” inatsimmik tunngaveqanngillat.

Inatsimmi tunngavissat qaangerlugit sulisitsisut assigiinngitsut inatsimmik sukangannginnerusumik paasinninnermikkut inatsimmik nalinginnaasumik saneqqutsisarsimappata tamanna assut ajornartorsiutitaqartut ataatimiititaliamit isigineqarpoq. Peqatigisaanillu aaqqissuussineq oqartussaasunit pisariaqarneratut nakkutigineqanngippat tamanna ajornartosiutitaqartut ataatimiititaliamit isigineqarpoq.

Taamaattumik aggersarneqarsinnaalluni pigaartuusarneq pisariitsumik atorneqarsinnaasunngorlugu tamatuma peqatigisaanik akileraarnaveersaarnissaq anguniaannarlugu aggersarneqarsinnaalluni pigaartuusarnermik aaqqissuussisalernissaq ammaatinnikkaluarlugu inatsimmik allannguinnissamut periarfissat Naalakkersuisunit misissorneqarnissaat ataatimiititaliamit innersuussutigineqarpoq. Assersuutigalugu atorfinnut atatillugu biilerisat pigaartuutilluni soorlu niuerniarnermut allanillu “sulinermut attuumangitsunut” atorneqarsinnaanerannik ajornartitsinninnissaq isumaliutigineqarsinnaavoq, tamatumani biilit sulisumit pigaartuusumit taamaallaat atorneqarsinnaanissaat tunngavissaatinneqassalluni.

### **Akileraartarnermut Akitsuusiisarnermullu Ataatsimiititaliap inassuteqaataa**

Siuliani oqaaseqaatit siunnersuummillu siullermeerinerimi oqaatigineqartut tunngavigalugit siunnersuut akuerineqassasoq

**Akilerartarnermut Akitsuusiisarnermullu Ataatsimiititaliap**  
inassutigaa.

Taama oqaaseqarluni Akilerartarnermut Akitsuusiisarnermullu  
Ataatsimiititaliap siunnersuut Inatsisartunit  
aappassaaniigassanngortippaa.

Niels Thomsen  
Siulittaasoq

Harald Bianco

Aqqaluaq Egede

Aleqa Hammond

Jens Imanuelsen